

皇
清
經
解

金

清

經

解

皇清經解卷一千九十六

學海堂

易通釋

江都焦孝廉循著

光

循按光之義為廣

見毛詩敬之傳

字通於橫

堯典光被四表後漢書馮異傳作橫被四表

兩

卦旁通自此及彼是橫行以及於遠傳於坤贊云含宏光大惟
含乃宏惟光乃大文言傳云含萬物而化光化光猶云廣生不
能含則成兩既濟不能廣生矣需彖云需有孚光亨貞吉乾成
需不可謂亨惟有孚於晉以需二之晉五則能變化廣生變通
乃有孚有孚光即化光也未濟六五君子之光有孚吉既濟已
定孚於未濟未濟二之五即需二之晉五之比例君子之光即
需之光亨也失道至需一光即亨終窮至既濟一光即吉彖示

其義於需爻發其義於未濟其義已了乾未成需先成小畜或
先成夬小畜孚於豫夬孚於剝與需孚於晉同故經於觀六四
明之云觀國之光利用賓于王小畜豫相錯爲大壯觀大壯二
之五爲小畜二之豫五之比例故以大壯二之五之光明小畜
二之豫五之光傳卽於夬贊云其危乃光乾成夬則坤成謙謙
傳云天道下濟而光明履傳云剛中正履帝位而不疚光明也
謙之光明卽履之光明謙孚履爲光則夬孚剝爲光可知夬孚
剝爲光則小畜孚豫爲光可知經以觀國之光明小畜之孚豫
傳於謙履夬贊之此贊之微妙者也坤六三傳云或從王事知
光大也從王事謂屯旁通於鼎知卽方以知之知由旁通而鼎
二之五爲知指出光字明如是則爲光光大猶云光明由旁通

而明爲光明由旁通而大爲光大屯旁通鼎爲光家人則通解
爲光傳於渙贊之渙六四渙其羣傳云光大也以光大二字與
坤六三相貫明以豐渙所錯之家人解與坤所變通之屯鼎相
發明也屯之通鼎猶益之通恆益彖傳云自上下下其道大光
承上民說无疆而言民說者恆二之五也大光猶光大到其文
與疆字爲韻謂其道所以大者由於旁通也惟其道大光所以
自上下下所謂天施地生也若屯不通鼎則家人上施於屯三
雖施而不光所以屯其膏以通於鼎鼎四之初成大畜大畜二
之五卽家人也其上施屯三仍不光矣大畜屯相錯則頤也傳
於頤六四贊云顛頤之吉上施光也顛頤旣同於鼎之顛趾則
顛頤之光卽顛趾之光也傳於屯九五云施未光於頤六四云

上施光推之大畜成家人則以通解爲光未成家人則以通萃

爲光皆發明坤六三之光大也傳稱未光者八

晉上九咸九四噬嗑六四夬九

五兌上六震九四屯九五萃九五

屯九五屯其膏施未光也贊家人上不可之

屯三矣萃九五萃有位无咎傳云未光也卽指鼎四之初成大

畜與頤六四上施光互明大畜必通萃其二之五乃得有位无

咎者以鼎二不之五而四之初未光也鼎成大畜未光大畜通

萃則光猶夬四之剝初成頤未光頤通大過則光也夬四之剝

初未光夬二之剝五則其危乃光夬九五中行无咎中未光也

與萃九五義同夬二所以莫陸中行乃无咎者以艮上之兌三

成謙夬未光也兌上六引兌之引卽萃六三引吉之引萃孚於

大畜爲夬剝之相錯知引兌爲成夬而孚于剝夬未光孚于剝

則其危乃光夬九五之未光卽兌上六之未光因未光而引因引而中行因中行而有位夬萃之九咎則已光矣傳本其未光而言之且以未光二字爲之絡也鼎四之初同於夬四之剝初亦同於噬嗑四之井初在噬嗑剝成頤在井夬成需所爲艱也頤通大過則光需通晉則光噬嗑九四噬乾肺得金矢利艱貞吉傳云未光也噬肺得矢需二之晉五也井所以成需由於噬嗑四之井初故以未光二字贊之明井初之噬嗑四猶鼎四之初也井成需則井泥故震九四震遂泥傳贊之云未光也巽成需卽井成需也但巽成需則震成明夷爲豐四之井初噬嗑四之井初井成需噬嗑未成明夷而成頤猶乾未成需先成小畜夬亦猶震未成明夷先成豐故豐通渙之光大同於夬通剝之

光而井之成需無論其爲噬嗑四之井初爲豐四之井初皆以
通晉爲光亨也未濟六五君子之光明豐四之井初成需者也
傳於遂泥贊之其義易明也觀六四觀國之光明噬嗑四之井
初成需者也

漸上之歸妹三成大壯蹇爲需小過
之錯小過四未之初猶頤上未之三

義爲隱奧故

於諸卦反覆贊明之需通晉光亨矣乃晉成咸又以通損爲光
晉上九維用伐邑道未光也言晉成咸合乎道矣未通損仍未
光也咸通損損成益益又通恆是爲憧憧往來傳云憧憧往來
未光大也未光二字與晉上九相貫而加一大字則與益彖傳
其道大光相貫而其道大光之道又與道未光道字相貫蓋不
必至成需明夷乃爲未光當其成頤大壯大畜夬卽未光矣頤
大壯大畜夬能變通固改未光爲光卽至成需明夷能變通亦

遂改未光爲光然未能往來不已如益恆咸損之回環相續其道仍未大光彙諸卦經傳之言光者研究之一字增減皆有妙義略觀大義者焉能探其微哉

時

循按雜卦傳云大畜時也說者多不詳以全經傳通之乃可知其義經文惟歸妹九四稱遲歸有時傳中諸言時字皆由此贊之歸妹所以遲者以征凶也征凶者漸上之歸妹三也漸成蹇歸妹成大壯大壯改而通觀蹇改而通睽所謂時也震巽艮兌交而成漸乾坤坎離則交而成比漸通歸妹猶比通大有漸上之歸妹三成蹇大壯大有上之比三亦成蹇大壯遲歸有時在歸妹成大壯有然在大有成大壯亦有然推之漸初之歸妹四

歸妹成臨漸成家人則以家人通解臨通遯爲時乃在漸初之
歸妹四成家人臨而在比初之大有四則比成屯大有成大畜
臨通遯同於大壯通觀則大畜通萃亦同於大壯通觀故經於
歸妹言時謂其成大壯通觀而傳則指大畜爲時明大有之成
大畜同於歸妹之成臨卽同於歸妹之成大壯也震巽兌艮交
成漸亦成隨乾坤坎離交成比亦成同人同人通師猶漸通歸
妹隨通蠱猶比通大有故此八卦互相比例漸上之歸妹三成
蹇大壯與大有上之比三同歸妹四之漸初成家人臨卽與同
人四之師初同大有四之比初成大畜屯與隨四之蠱初同隨
三之蠱上成升革卽與同人上之師三同於大壯通觀爲時知
大畜通萃爲時而升通无妄臨通遯爲時可知矣經於歸妹指

一時字舉一隅也傳則以大畜爲時又舉一隅也猶恐學者未明於隨贊云天下隨時於升贊云柔以時升於遯贊云剛當位而應與時行也於无妄贊云茂對時育萬物於家人之通解則贊云待時而動於革之通蒙則贊云以亨行時中於蹇之通睽則兩卦皆云時用大矣哉可謂詳矣而大畜之所以時以其通萃也傳不贊於萃而贊於既濟九五既濟者益上之三者也益三五坤爲牛上之三殺之是爲殺牛益通於恆恆上震東也恆成咸上兌西也傳云東鄰殺牛不如西鄰之時也經稱西鄰禴祭傳以時字代之以時字贊禴字贊既濟九五之禴卽贊萃六二升九二之兩言禴萃言无咎孚乃利用禴升言孚乃利用禴无咎萃本无咎與大畜孚則爲利用禴升爲蠱上之隨三本有

咎孚於无妄則爲利用禴无咎二字一先言一後言明以升例大畜以萃例无妄傳旣以大畜爲時又以時字贊禴字則萃之孚乃利用禴卽是孚大畜爲時大畜孚萃爲時則大壯孚觀爲遲歸有時例諸此矣不特此也歸妹之言時謂大壯蹇也傳旣於睽蹇稱時用於觀云觀天之神道而四時不忒又於小過云過以利貞與時行也大壯蹇相錯卽小過需也傳於睽蹇蒙解俱指其爲時矣於屯鼎未言也則言之於乾坤也歸妹漸爲震巽兌艮之比例漸成蹇歸妹成大壯以失道而變通漸成蹇歸妹成革以當位而變通無論失道當位蹇俱以通睽爲時蓋漸成蹇歸妹成大壯同於比成蹇大有成大壯而漸成蹇歸妹成革卽同於巽艮成蹇震兌成革推之漸成家人歸妹成臨同於

同人成家人師成臨而漸成家人歸妹成屯卽同於巽艮成家
人震兌成屯其震巽兌艮之成屯家人蹇革原無異於乾坤坎
離之成屯家人蹇革故遲歸有時在大壯僅爲失道變通者之
例在蹇則兼爲當位變通者之例此亦舉一隅也故傳旣以大
畜贊大壯而蹇之待時則暢發於艮艮彖傳云艮止也時止則
止時行則行動靜不失其時其道光明時止艮成蹇兌成革則
止不行也時行蹇通睽革通蒙則以亨行也艮之成蹇猶坎之
成蹇故坎傳稱時與蹇同乾九三文言傳云乾乾因其時而惕
乾通坤成屯屯又通於鼎是爲時惕卽爲與時偕行九四文言
傳云君子進德修業欲及時也時惕贊屯之通鼎及時贊革之
通蒙坤六三含章可貞含章謂坤成屯卽含之而通於鼎三乃

可貞傳云時發也發卽發蒙之發明屯通鼎猶革通蒙也屯之通鼎猶益之通恒故坤六三之可貞卽損彖之可貞傳於損彖贊之云二簋應有時損剛益柔有時損益盈虛與時偕行二簋一指損五一指益二簋在益二則盈盈則宜損之損剛者變通於恒也簋在損五則虛虛則宜益之益柔者損二之五成益也益通恒爲損剛咸通損亦爲損剛先稱損剛指咸之於損也損二之五成益爲益柔恒二之五成咸亦爲益柔次稱益柔指恒之爲咸也損傳云與時偕行益傳亦云與時偕行與乾九三之與時偕行相發明明咸通損猶益通恒益通恒猶屯通鼎乃知贊禴祭爲時固以旣濟之禴例諸升萃之禴其不贊於升萃必贊於東鄰西鄰者正以益通恒之時卽屯通鼎之時亦卽大畜

通萃升通无妄之時不論失道當位其時行皆如是也於是豫
姤言時義明小畜復之變通也旅亦言時義節言失時明節之
通旅猶小畜通豫復通姤而旅四之初仍兌四之艮初卽猶乾
四之坤初凡稱時用時義各有所鈎貫非泛言也賁傳云觀乎
天時以察時變明賁通困也豐傳云天地盈虛與時消息明豐
通渙也經舉一隅傳已不憚徧舉諸隅而於繫辭傳總揭其義
云變通配四時云變通莫大乎四時云變通者趣時者也時之
爲變通不煩言而決矣

實

循按鼎九二鼎有實六五傳云鼎黃耳中以爲實也鼎五虛二
之五則實二不之五而四之初則爲覆餗餗說文作鬻訓鼎實

覆餗則無實與有實互見覆餗則鼎成大畜大畜孚於萃則篤
實輝光篤實者二先之五而後上之萃三也所以篤實由發揮
而旁通故云輝光頤猶大畜也大過二顛於頤五則頤五有實
可知頤成益旁通於恆恆二之五成咸上兌爲口故爲口實益
通恆所謂西鄰禴祭也故云實受其福歸妹上六女承筐无實
謂二不之五而漸初之歸妹四傳云承虛筐也女承筐士又刲
羊則成泰傳於泰六四贊云翩翩不富皆失實也失實而云皆
者一以贊刲羊承筐之无實一以贊西鄰禴祭之實受其福不
富以其鄰之鄰卽東鄰殺牛之鄰在西鄰禴祭則實受其福在
東鄰殺牛則不實可知福猶富也不富卽不受福傳以失實與
實受其福互明歸妹成泰已失實否成益不通恆又失實故云

皆失實也臨成泰失實升成泰亦失實升九三升虛邑蒙上之三成升五失實而虛既通无妄則二之五爲升虛邑升虛邑則不失實故蹇六四往蹇來連傳云當位實也升二先之五成蹇則无妄四之升初不成泰不成泰則當位當位則不失實也若蒙上之三革四又之蒙初成泰則失實泰雖通否改而有實已遠而不近故蒙六四傳云困蒙之吝獨遠實也遠實者近不能
有實於蒙待遠而有實於泰也

盈

循按序卦傳云盈天地之閒唯萬物故受之以屯屯者盈也此與乾上九傳盈不可久互明乾成家人坤成屯再行則窮故盈不可久謂之盈者謂其宜變通也比初六有孚盈缶比孚大有